

## Skýrsla umdæmisstjóra

Meðfylgjandi starfsskýrsla er greinargerð um það helsta sem verið hefur á borðum umdæmisstjórnar á annasömu og óvenjulegu starfsári. Óvenjulegu að því leyti að umdæmisstjóri sat nú í annað ár. Og eðlilega gafst lítil tími til undirbúnings nýrra stefnumála og áherslna. Stefnumótun, kjörorð og markmið starfsársins 2009-2010 voru hins vegar valin af yfirvegum og kostgæfni og urðu því skiljanlega áframhaldandi leiðarljós. Vonandi hefur tekist að skerpa á þeim og að koma anda þeirra til betri skila. Ég geng sáttur frá borði, þreyttur en ekki úrvinda. Margt er óunnið, en heilmiklu hefur verið áorkað, arfleifðin óflekkuð. Jákvæðni og bjartsýni á hlutverk okkar hefur skotið dýpri og nýrri rótum og persónulega vona ég að hafi ég valdið þeirri ábyrgð og trausti sem fólst í vali ykkar á mér til umdæmisstjórarstarfsins annað árið í röð.

### Minnigarorð

Á hverju ári falla jafnan góðir Kiwanisfélagar í valinn. Við stöldrum við, hugsum um þeirra margvíslegu og góðu verk, heiðrum minningu þeirra og geymum þá í hugarskoti okkar. En lífið heldur áfram. Á starfsárinu hafa óvenjumörg skörð verið hoggin í raðir okkar, veikindafréttir og dauðsföll Kiwanisfélaga nánast daglegt brauð. Þetta er eitthvað sem við ráðum litlu um, en sendum þeim í Kiwanisfjölskyldunni sem eiga um sárt að binda vegna veikinda eða fráfalls, maka, ættingja, vinar eða félaga, hugheilar samúðar- og baráttukveðjur.

### I. Fundir og heimsóknir

#### Umdæmisstjórnarfundir:

Haldnir voru fjórir umdæmisstjórnarfundir á árinu, þ.a. tveir með öllum embættismönnum. Sérstakur símafundur var og haldinn til staðfestingar umdæmisins á framboði Andrésar Hjaltasonar til heimsstjórnar. Fundirnir voru málefnalegir, K-dagsumræða tók sinn tíma auk umræðu um framvindu nýrrar svæðaskiptingar. Reglulega var fundað í framkvæmdaráði, þar sem fjallað var um helstu umdæmismál líðandi stundar. Góðir og nauðsynlegir upplýsingafundir oft með sitjandi embættismönnum og verðandi framkvæmdaráðsfólki.

#### Svæðisráðsfundir:

Framkvæmdaráðsfulltrúar sátu svæðisráðsfundi í öllum svæðum og fleiri en einn í þeim flestum. Ég vil hrósa svæðisstjórum fyrir góða og vel skipulagða fundi og félögum fyrir góða mætingu og almenna og málefnalega þátttöku í umræðum. Sérstaklega ánægjulegt var að sitja sameiginlegan fund Þórs- og Eddusvædis þar sem formsatriði vegna sameiningar svæðanna voru afgreidd á lýðræðislegan og lögformlegan hátt. Reglulega var svo lagt á ráðin með svæðisstjórum um nýja svæðaskiptingu.

#### Klúbbaheimsóknir:

Heimsóknaskyldu umdæmisstjóra var sinnt eftir megni. Klúbbar voru heimsóttir, ýmist sér eða sameiginlega. Í heimsóknum sannreynði ég það sem skýrslur klúbbana bera með sér, vaxandi virkni, góðan félagsanda og jákvæðni, fjölbreyttar og árangursríkar fjáraflanir, óþrjótandi styrktarverkefni, góða fundasókn og ákveðna óþolinmæði og eftirvæntingu vegna yfirvofandi landsverkefna. Á sinn hátt voru allar heimsóknirnar ánægjulegar, en uppúr standa ferð og frábær fundur hjá Öskju á Vopnafirði með 5 klúbbum úr Óðinssvæði. og heimsókn okkar Konny til Færeyja í sameiginlega 50 ára afmælisveislu Tórshavn (30 ára) og Rósan (20 ára). Öllum félögum þakka ég frábærar móttökur og skemmtilega fundi. Allsstaðar hef ég mætt fádæma velvild og gestrisni sem seint verður fullþökkuð.

#### Evrópumál:

Umdæmisstjóri sækir fundi Evrópurstjórnar og -þing. Í ár var fundaði í tvígang í Munchen og á Evrópuþingi í Haag í Hollandi. Vegna nefndarformennsku í fjölgunarnefnd KI-EF var umdæmisstjóra boðið á undirbúningsfundi vegna KI-EF starfsársins og síðan á fjölgunarráðstefnu í Munchen ásamt öðrum embættismönnum. Umdæmisstjórar ásamt fulltrúa styrktarsjóðs sátu sérstakan kynningarfundur á nýja heimsverkefninu í Prag í vor. Við sama tækifæri fundað

umsjónarmaður gagnagrunns með kollegum í Evrópu. Umræðan á fundum Evrópustjórnar er jafnan margbreytileg, en í ár má segja að tvennt standi uppúr. Á febrúarfundi var undirritað „sögulegt skjal“ sem innsiglaði sjálfstæði Evrópu um stjórnun eigin mála, en með skilyrtum fjárhagsstuðningi frá KI. Hitt var að svo bar til tíðinda á Evrópuþingi að reikningar starfsársins 2009-2010 voru kolfelldir, þegar kröfu þingheims um haldbærar skýringar á um 80 þús. evra halla var ekki sinnt. Framkvæmdastjórn sá þó að sér og boðaði sérstakan stjórnarfundur á heimsþingi. Þar var ákveðið að setja á laggirnar sérstaka rannsóknarnefnd til að kryfja reikningana. Atli Þórsson mun verða einn af þremur fyrrverandi umdæmisfélirðum sem vinna það verk og skila skýrslu í septemberlok. Evrópuforseti næsta árs var útnefndur Paul Inge Paulsen frá Noregi, en sjálfkjörinn kandidat í Evrópuforseta var Marie-Jeanne frá Frakklandi.

### **Heimsþing:**

Heimsþing var haldið í Genf í Sviss í byrjun júlí. 15 atkvæðisbærir umdæmisfélagar sátu þingið. Ferðanefnd efndi til þingferðar og tóku 26 manns þátt í henni. Þingið var fámenn og tíðindalítið, engar lagarbreytingar, engar ályktanir en að venju fræðsla og vinnustofur. Eliminateverkefninu var formlega ýtt úr vör og upplýst að þegar hafi safnast \$4mil. Að venju voru embættakosningar á dagskrá. Við biðum með mikili eftirvæntingu eftir kosningu um laust sæti í heimsstjórn, þar sem Andrés Hjaltason var í framboði. Bjartsýni ríkti um góða kosningu, fólk var jákvætt í hans garð og stuðningsloforð borist víða að. Í tilfelli sem þessu er þó greinilega ekki á vísan að róa, því Andrés varð undir í kosningu þriggja frambjóðenda. Með Hönnu sér við hlið stóð hann sig hetjulega og þó að ekki hafi farið sem skyldi, er viss sigur fölginn í því að hafa yfirleitt gefið kost á sér. Umdæmisstjóri var formaður kjörbréfanefndar á þinginu og þeirrar ánægju aðnjótandi að fá að kynna framboð Andrésar. Nýr heimsforseti er Íslandsvinurinn Alan Penn, Gunter Gasser frá Austurríki var kosinn sem heimsforseti 2013-2014.

## **II. Fjölgun og efling**

### **1012 fyrir 2012:**

Í október 2009 voru Kiwanisfélagar 882, nú 2 árum síðar eru þeir um 970. Í kjölfar áminningarbréfs heimsstjórnar 2008 um að ná umdæmisstærð fyrir starfsárið 2012-13, varð „1012 fyrir 2012“ að sérstöku fjölgunarmarkmiði. Það er nú í seilingarfjarlægð. Viðsnúningur hefur orðið í nýklúbbastofnun, sem óumdeilanlega er kjarni viðvarandi raunfjölgunar sem ekki hefur orðið í umdæminu til margra ára. Kiwanisklúbbarnir Varða og Eldfell voru vígðir á árinu og græðlingsklúbburinn Dyngja og lykilkúbburinn Blámi eru orðnir að veruleika. Fyrir hönd hreyfingarinnar þakka ég því kraftmikla, áræða og baráttuglaða bjartsýnisfólki, sem blés á mýtuna, axlaði ábyrgðina og lét verkin tala. Gleðilegt er líka til þess vita að fjölgun kvenna í umdæminu er umtalsverð. Kvennanefnd hefur ótvírætt lagt sitt á vogarskálarnar og umdæmið loks komið í hælfar Evrópuumdæma hvað kvennfélagafjölda varðar.

Nýklúbbastofnun vegur þungt í eflingu umdæmisins, en meira þarf til. Því miður varð heimsstjórn ekki við erindi okkar um að telja virka Sinawikfélaga til gjaldfrírra aukafélaga, en við gerum aðra atrennu. Í mörgum klúbbum hefur orðið veruleg fjölgun, í öðrum minni en jákvæð, margir klúbbar hafa staðið í stað og einhverjir hafa ekki getað fyllt í skörð horfinna félaga. Maður á mann aðferðin hefur dugað klúbbum til fjölgunar því Kiwanisstarf í flestum klúbbum er skemmtilegt og gefandi. Í ár hafa öflugar fjáraflanir og fjölbreytt styrktarverkefni einnig skilað óvenju miklu til samfélagsins. Hömpum gildum Kiwanisstarfsins: vináttu, þjóðfélagslegri ábyrgð, þjónustu við börn og þá sem minna mega sín. Nýtum meðbyrinn til að laða nýja félaga í okkar raðir Lykilatriðið er að spyrja! 100% þeirra sem ekki eru spurðir, ganga ekki til liðs við okkur.

## **III. Úr ýmsum áttum**

### **Svæðaskipting**

Ný svæðaskipan sem var samþykkt samhljóða á umdæmisstjórnarfundum vorið 2010, tekur gildi 1. okt. Breytingu sem fyrst var hreyft með tillögugerð haustið 2009 er orðin staðreynd. Skipulega hefur verið unnið að innleiðingu breytingarinnar. Svæðisráð og –stjórnir hafa fundað og tekið nauðsynlegar stjórnskipulegar ákvarðanir og velt upp ýmsum hliðum á breytingunni. Umræðan, í grasrótinni, í klúbbum, svæðum og á umdæmisfundum, hefur almennt verið á afar jákvæðum nótum og falið í sér viðurkenningu á, að í ljósi breyttrar aðstæðna í hreyfingu og þjóðfélagi, sé nauðsyn að hrófla við 20 ára gömlu skipulagi. Mörgum spurningum er enn ósvarað, sérstaklega í svæðum þar

sem breytingarnar verða hvað mestar. Í þessu verkefni hefur jákvæðni hingað til verið höfð að leiðarljósi, verði hún það áfram verða álitaeftin tölkuð af festu og sem lausir - ekki vandamál.

### **K-dagur og K-lykill:**

Verkefnið var fókus allt árið, mikið í umræðunni, eftirvænting mikil. Söluátakið í vor tókst með ágætum og skilar umtalsverðum fjárhæðum til samþykktara styrktarverkefna. Ytri kynning verkefnisins var til fyrirmyndar og auðveldaði sölu. Verkefnisstjórn gerir nánari grein fyrir ánægilegri niðurstöðu seinna í dag, en ég vil nota tækifærið og þakka K-dagsnefnd fyrir 3ja ára frábær og ómetnaleg störf að einu af okkar stærsta og mikilvægasta styrktar- og fjáröflunarverkefni.

### **Hjálmaverkefnið:**

Á árinu var gerður 3ja ára samningur við Eimskip um áframhaldandi styrktaraðild fyrirtækisins. Samningurinn skýtur sterkum rötum undir þetta einstaka forvarnarverkefni, sem nýleg dæmi sanna að á fyllilega rétt á sér. Á hverju ári koma upp ýmsir hnökrar á framkvæmdinni og samstarfinu. Opinberir eftirlitsaðilar hafa t.d. haft óvenju mikinn áhuga á verkefninu, en þau mál hafa verið farsællega til lykta leidd. Hnökarnir eru til að leysa þá og mega ekki skyggja á mikilvægi þeirra hagsmuna sem að veði eru. Ég þakka verkefnisstjórn frábær og ómetnaleg störf að framgangi og framkvæmd þessa mikilvæga landsverkefnis.

### **Stefnumótun:**

Undir forystu kjörumdæmisstjóra hefur verið unnið að nýrri stefnumótun umdæmisins til fimm ára. Drög voru send klúbbum til kynningar og þau verða rædd og væntanlega samþykkt á umdæmisþingi. Eigi þessi vinna að skila sínu verður að tryggja að framkvæmd stefnumarkandi aðgerða, eftirfylgni og endurskoðun á áherslum sé tryggð og aðhald félaga og klúbba sé á borði en ekki orði.

### **Frétta- og upplýsingamiðlun**

Kiwanisfréttir komu tvisvar út á starfsárinu auk fyrirliggjandi þingblaðs. Umdæmisstjóri sendi frá sér fréttabréf sem birtust á netinu og var dreift rafrænt til allra félaga. Efnið var fréttáflutningur af umdæmisvettvangi og hvatningi til félaga og embættismanna. Kiwanis.is hefur sannað sig sem helsti upplýsingamiðill hreyfingarinnar og markvisst er unnið að því að aðlaga hana breytilegum þörfum umdæmisins. Skemmtilegar nýjungar komu fram við nýjustu uppfærslu. Ég hvet Kiwanisfélaga til að heimsækja síðuna og reglulega senda inn efni á báða fréttamiðla okkar.

### **Sumarbúðir í Finnlandi**

Í lok júlí fóru umdæmisstjóraahjónin fyrir hópi 9 unglinga í vikulöngum Kiwanissumarbúðum í Finnlandi. Búðirnar fengu styrk frá Ráðherranefnd Norðurlandaráðs, sem stóð undir ferðakostnaði hópsins. Færeyingum stóð til boða að senda þátttakendur, en rúmlega mánaðar fyrirvari var skiljanlega of stuttur að safna liði. Okkar hópur naut hinsvegar fyrri reynslu og mætti tilbúinn með sín verkefni þó fyrirvari væri naumur. Krakkarnir stóðu sig frábærlega og voru sjálfum sér og hreyfingunni til mikils sóma. Ávöxtur fyrri ferðar var stofnun Lykilkúbbsins Bláma, en ávöxtur þessarar ferðar ber e.t.v. ávöxt um áramót, en það er sá tími sem okkur var gefinn til að kanna möguleika á slíkum búðum á Íslandi. Skipuð hefur verið nefnd til að skoða málið.

### **Eliminate – nýtt heimsverkefni KI**

Styrktarsjóður mun hafa verkstjórn með þessu nýja heimsverkefni, sem nú hefur formlega verið hleypt af stokkunum. Verkefnið verður unnið í einhverju samstarfi við landsstjórnir Unicef og þegar hefur verið haldinn kynningarfundur með umdæminu og framkvæmdastjóra Unicef á Íslandi. Væntingar til verkefnisins eru miklar og á ég ekki von á öðru en að við stöndum skil á okkar. Margir klúbbar hafa t.d. tekið áskorun styrktarsjóðs um regluleg framlög og eftir því sem framvindur munu eflaust ýmis verkefni og uppákomur líta dagsins ljós.

### **Hekla og hreyfingin 50 ára:**

14. janúar 2014 fagnar umdæmið 50 ára afmæli Kiwanisklúbbsins Heklu. Erindi vegna tímamótanna var sent Einherjum í fyrra og þeir beðnir að koma að hátíðarhöldum í samvinnu við Heklufélaga og umdæmisstjóra næstu ára. Óformleg vinna er einnig hafin að því að skrá sögu

hreyfingarinnar, en klúbbar munu koma inn í þá vinnu á einhverjum nálægum tímapunkti.

### **Framboð til kjörumdæmisstjóra**

Svo brá við að enginn frambjóðandi til embættis kjörumdæmisstjóra 2012-2013 hafði gefið sig fram þegar umsóknarfrestur rann út. Eftir ítrekaðar áskoranir og ófá samtöl umdæmisstjóra við kjörbæra félag, gaf mjög svo frambærilegur félagi sig fram, Dröfn Sveinsdóttir, Sólborgu. Ég fagna því. Af samtölum mínum fæ ég hins vegar ráðið að félagar veigra sér við framboði vegna óskilgreinds kostnaðar sem embættinu ku fylgja. Fælir umræða undanfarinna ára um milljónakostnað fólki frá því að bjóða sig fram til ábyrgðarstarfa fyrir umdæmið? Var ég þá, umdæmisstjóri til tveggja ára, óbreyttur borgarstarfsmaður á lúsarlaunum, ófær um að sinna embættisskyldum mínum af því að ég festi mig ekki í skuldafeni? Þvert á móti. Eini verulegi fórnarkostnaðurinn sem ég fann fyrir var frítími minn og sumarleyfi. Hann met ég ekki til fjár heldur fórnaði góðfúslega fyrir að hafa fengið að sinna óumræðilega gefandi og skemmtilegu starfi. Ég viðurkenni samt að ég geng stórskuldugur af vaktinni, en þær skuldir eru fyrst og fremst þakkarskuldir!

### **Lokaorð**

Við óvenjulegar aðstæður fyrir ári síðan, var viss ábyrgð lögð á herðar mér. Hana axlaði ég hiklaust, vitandi að frábært og reynslumikið samstarfsfólk væri tilbúið í aðra vegferð. Nú er komið að leiðarlokum og að framan hefur verið stiklað á því helsta sem þessi hópur hefur verið að sýsla við á starfsárinu. Í mörg horn var að líta og að mörgu að hyggja, en vonandi ber skýrslan þess vitni að hér var starfssöm stjórn að verki. Hjálparhellurnar mínar, þau Hjördís og Atli stóðu vaktina í mót- og meðbyr, úrræðagóð og þrautseig. Ekki bar skugga á þá samvinnu. Ragnar kjörumdæmisstjóri kom sterkur að stjórnarborðinu, ólíkt síðasta ári þá dreifðist ábyrgðin meira núna. Við óskum honum og stjórn hans velfarnaðar og styðjum þau til allra góðra verka. Embættismönnum umdæmisins færi ég kærar þakkir fyrir góð og samviskusamleg störf. Svæðisstjórum þakka ég góða samvinnu og alúð þá og ræktarsemi sem þeir hafa sýnt svæðum sínum og klúbbum og þá ábyrgð sem þeir hafa sýnt í allri sinn framgöngu. Umdæmið er félagarnir, klúbbarnir og svæðin og með áhuga- og samviskusama svæðisstjóra innanborðs hljótum við að sigla heil í höfn. Eldeyjarfélögum þakka ég áframhaldandi einlægan stuðning. Konu minni þakka ég alla hennar þolinmæði, tillitssemi og jákvæðni í 7 ára umdæmisbjástri. Án umburðarlyndis, stuðnings hennar og hvatningar hefði ég aldrei lagt í þennan framhaldsleiðangur. Efst eru mér þó í huga þakkir til allra til þeirra Kiwanisfélaga sem stutt hafa mig og leiðbeint, féлага sem ég hef hitt í leik og starfi, án þeirra fórnfúsus handa, hlýhugar og Kiwnisþels, væri hreyfingin ekki það sem hún er í dag. - Stærsta þjónustuhreyfing í heimi sem hefur að markmiði að bæta heiminn með þjónustu í þágu barna – Ábyrgðin á því er okkar – okkar allra!!! Megi guð og gæfan fylgja ykkur og Umdæminu Íslandi–Færeyjar um ókomin ár.

Umdæmisstjórinn ykkar  
Óskar